

HITZ BITAN

KOMUNIKABIDEAK. EITBk hiru sari eraman ditu

EITB, 'Nabarra', 'sustatu.com' eta Herri Irratiak jaso dituzte aurtengo Argia sariak

Erredakzioa | DONOSTIA

Argia astekariak atzo banatu zituen, urtero legez, Argia sariak. Saridunak honakoak dira: Irratigintzan, Euskadi Irratiko *Lauzetara* saioa; telebistaren atalean, *Euskal Herria: Lau Haizeetara* saioa; publizitatearen alorrean, Publis agentziak EITBrentzako egindako azken irudi kanpaina; idatzizkoan, *Nabarra* aldizkariak eraman du saria; eta Interneten saria *sustatu.com* webguneak jaso du. Azkenik, merezimenduari ematen zaion saria Herri Irratiak jaso du.

Atzo egindako ekitaldian saridunak hautatzeko arrazoiak argi eta garbi azaldu zituzten. Hala, prentsa idatzian *Nabarra* aldizkariak jaso zuen saria, eta «apustu ausarta» egin duela nabarmendu zuten: «Formatu erakargarri eta kalitatez eran-

tzun diote, euskararen aldeko urrats eta mugimendu guztiak oztopatu nahi dituen Nafarroako Gobernuari». Gontzal Agotek jaso zuen saria.

Irratian arratsaldeko *Lauretan Babel* saioari eman zioten Argia saria. «Kultura eta gizarte gaien ikuspegi zabal eta aberatsa belarrien gozagarri bihurtzea lortu dute, eta informazioa eta entretenimendua era orekatuan uztartzea», arrazoitu zuten, saria ematean. Susana Mujika esatariak jaso zuen.

Euskal Herria: Lau Haizeetara saioa, berriz, «ETBren eskaintzan mugarrira markatu duen saioa» delako aukeratu dute. Gogoan izan zuten lantaldeko kideek helikopteroan izandako istripua, eta onik atera zen Santiago Ianiz argazkilariak jaso zuen saria.

Publis agentziari EITBrentza-



IMANOL OTEGI / ARGAZKI PRESS

Susana Mujikak, Gontzal Agotek, Ibon Arantzabalek (goian), Publiseko ordezkariak, Santiago Yanizek, eta Txema Auzmendik jaso zituzten, atzo, Argia Sariak.

ko egindako kanpainagatik eman diote saria. «Euskal medio garrantzitsu baten irudi erakargarri eta berritzailea gizarteratu du», adierazi zuten, txapela alderantziz janzten duen baserriko seme gaztearen eta aulki kulunkarian mahatsak jaten dituen amonaren iragarkiei erreferentzia eginez.

Sustatu.com web orriari «albisteak eta informazioa lantzeko eta aurkezteko modu berritzaile batekin sarreratzegatik» eman diote Sareko Argia saria. Informazioa eskaintzeaz gain, gogoeta eta eztabaidarako eskaintzen duen aukera nabarmendu zuten. Ibon Arantzabal editoreak jaso zuen saria.

Azkenik, Merezimendu Saria Herri Irratiak eskuratu du. Iaz 40 urte bete zituen, eta «urte luzeetan euskaltzale guztien erreferente ia bakarretakoa» izan zela gogorarazi zuten atzoko ekitaldian; «eta, zailtasunak zailtasun, erreferente izaten jarraitzen du». Txema Auzmendi kazetariak jaso zuen saria.

ISTRIPUA

Gizonezko bat hil da Bilbon, A-68 autobidean, gidatzen ari zen autoa bidetik aterata

Atzo arratsaldean gizonezko bat hil zen Bilbon, Ur Partzuergoaren parean, A-68 autobidean zihola. Eusko Jaurlaritzako Herriarango Sailak jakinarazi zuenez, gidatzen ari zen autoa bidetik aterata zen, eta iraulita gelditu zen. Gidaria barruan harrapatuta gelditu zen, eta suhiltzaileek aterata behar izan zuten; baina beranduegi zen eta lekuan bertan hil zen. Ezbeharrak 16:20an gertatu zen, eta autoa hiru ordu geroago arte kendu zuten; horrek zirkulazio arazoak eta auto ilara luzeak eragin zituen autobidean.

AHT

Eusko Jaurlaritzak lehiaketara aterako du Gipuzkoako zatia, Espainiako Gobernuak egiten ez badu

Alvaro Amann Eusko Jaurlaritzako Garraio sailburuak atzo adierazi zuenez, Espainiako Sustapen Ministerioak egiten ez badu, Jaurlaritzak berak aterako ditu lehiaketara Abiadura Handiko Trenaren (AHT) Gipuzkoako zatia eraikitzeko lanak. Amannek esan zuen dagoeneko lehiaketara aterata direla Irun eta Zumarraga arteko zatiaren proiektuak. «Eta lehen proiektua behin betiko onartu bezain laster ekingo diogu eraikuntza lanen lehiaketa publikoari», gaineratu zuen. Hala ere, lehiaketarako deialdia Sustapen Ministerioak egitea nahi dutela esan zuen, eskuduntza harena delako: «Baina, edozein arrazoiengatik prest egongo ez balitz, gu geu hasiko ginateke».

FAMILIA

Arabako Foru Aldundiak 1.200 euroko laguntza onartuko du 3 urtez azpiko umeak dituzten amentzat

Ramon Rabanera Arabako diputatu nagusiak atzo iragarri zuenez, PPK zuzenketa aurkeztuko dio Pertsona Fisikoen Errentaren Gaineko Zergaren araudiari, 3 urtez azpiko umeak dituzten amek urtean 1.200 euroko kenkaria izan dezaten. Bizkaiko eta Gipuzkoako foru aldundiek haur kopuruaren arabera aplikatzen dute kenkaria, eta Arabakoak bi baldintzak saritu nahi ditu. EAK, baina, kritikatu egin zuen neurria, hauteskundeei begirako «neurri populista» delako.

ZUBEROA

Euskal Garapen eta Kohesio Funtsa aurkeztu dute, euskal lurraldeen kohesioa indartzeko xedez

Erredakzioa | DONOSTIA

Udalbiltzak Euskal Garapen eta Kohesio Funtsa aurkeztu zuen atzo, Maulen. Erakunde berria iaz abiatutako Xiberoa Garatzen kanpainaren ondorioa da, eta, Dominique Duhalde Udalbiltzako Batzorde Eragileko kideak azaldu zuenez, «herrialdeen arteko harremanen sakontzea du xede, euskal lurraldeen arteko kohesioa indartzea».

Zuberoak duen egoeraz «kezkaturik» abiatu zuen Udalbiltzak kanpaina, «lurralde horren etorkizuna ziurtatzeko xedez, bai ekonomikoa, bai soziala eta bai kulturala, hizkuntzaren iraupena barne». Hala, Funtsa hornitzeko 401.745 euro lortu dituzte iaztik, eta horrekin jarriko dute erakunde abian.

Funtsaren kudeaketari dago-kionean, Duhaldek azaldu zuen diru finantzabiderako irizpideak Zuberoako eragileekin batera hitzartuko dituztela; horien artean, gizarte eragileak, enpresaburuak, sindikatuak, nekazariak eta aisialdirako eragileak. Funtsak dagoeneko 15 proiektu jaso dituzte —hainbat esparrutatik aurkeztuak—.

ITSAS ISTRIPUA

'Konstantinos' zamaontzia Santanderrera eramango dute konpontzera, itsasoak uzten duenean

Konstantinos zamaontzia ez dute Bilbon konponduko, Santanderren baizik (Kantabria, Espainia). Hala, itsasoak eta ontziaren baldintzek uzten dutenean eramango dute Kantabriara, atzo Espainiako Gobernuak Bizkaian duen Ordezkariordeztak jakinarazi zuenez. Zipreko bandera duen ontzia iragan asteazkenean iritsi zen Bilboko Portura, Baionako portuan istripua izan ondotik. Atzo egindako azken azterketaren ondotik, Bilboko Itsas Kapitaintzak ondorioztatu du dike lehor bat behar dela ontzia konpontzeko. Gainera, azterketa horietan baieztatu dute ontziak bi zulo dituela kroskoan, bata brankan eta bestea albo batean.

DROGA TRAFIKOA

Gizonezko bat atxilotu du Ertzaintzak Gasteizen, ustez heroina trafikatzegatik

Ertzaintzak herenegun gizonezko bat atxilotu zuen Gasteizen, osasun publikoaren aurkako delitu bat egiteaz akusatuta. Atxilotutakoa I.L.G. 41 urteko gizona da. Ertzaintzak jakinarazi zuenez, etxean heroina eta bestelako droga batzuk aurkitu zituzten. Horrez gain, pisuak, eta droga moztu eta manipulatzeko tresnak ere aurkitu zituzten. Ertzaintzak jakinarazi zuenez, atxilotutakoak droga saltzen zien inguruko drogazaleei. Atxilotu ostean, komisarian beharrezko tramite guztiak egin ondoren, epailearen aurretik igaro zen.

HEZKUNTZA

Telekomunikazioetan ikerketak egiteko ituna sinatu dute MUK eta Madrilgo Unibertsitate Politeknikoak

Mondragon Unibertsitateak eta Madrilgo Unibertsitate Politeknikoak lankidetzara hitzarmena sinatu zuten atzo telekomunikazioen alorrean, ikerketa, irakaskuntza eta transferentzia teknologikoan elkarlan dinamika bat aurrera eramateko. Hitzarmena sinatu zuten Ikerlan Zentro Teknologikoak eta Mondragon Korporazio Kooperatiboak ere (MCC). Telekomunikazioen hirugarren zikloko ikasketak bultzatuko dituzte bi unibertsitateok, eta bi unibertsitateek zuzendutako tesiak egingo dituzte. Irakasle, ikertzaile eta ikasleak trukatzeko ere aurreikusten du itunak.